

胡文忠公遺集

胡文忠公遺集卷十一

長沙鄭敦謹

湘鄉曾國荃

編輯

官軍分攻合剿大破援賊疏

六年八月十五日

臣於七月十七日將剿禦援賊情形馳奏在案

臣查

翼賊石達開號稱數萬其兇悍老賊不滿二千其上年從江西新附之粵匪二萬甘心作賊較他賊稍悍然考其侵犯江西各府繼而甯國而鎮江而金陵屢敗官軍非官軍之勇力不如賊恃其狡詐多方誤我乘間抵禦四路侵軼往往因驚駭而自誤也

臣上年

車埠之敗羅澤南上年濠頭堡之敗先勝後挫均誤於此此次從金陵大舉上犯臣與李續賓先後選派精銳五千人於魯家巷擇險安營地頗狹隘旁挾兩湖洪山與五里墩兩處亦各枕三湖臣料賊必攜民船入湯孫湖南湖青林湖以襲臣營與魯家巷之後且必於青山港修橋以通城賊亦必擡船由沙湖東湖以襲洪山魯家巷之營臣楊載福以外江沙口礮船隨時入青山港攻勦臣復調派把總姚教忠守備瞿定國及上游沌口下游沙口各營舢板三十餘隻由外江挽入內湖分布於南湖東湖湯孫湖青林湖

以彌縫陸師之闕臣官文以南岸兵單七月十三日
選派馬隊百一十名七月二十三日選派馬隊二百
九十名先後渡江以壯南軍之氣其魯家巷統帶行
營同知蔣益澧久勞致疾七月二十四日臣復派游
擊張榮貴暫統之臣與李續賓更番前往察看布置
軍心益堅此兵情賊勢之大概情形也七月十六日
賊開四門分六路以撲洪山迤巡不遽進李續賓飭
各營靜以待之良久忽引去未刻復出填壕並進直
薄我營李續賓派蔣澤澧率湘中營於東嶽廟前而
自率湘右營前左兩哨截於田隴賊遂敗走其殲於

濠中者約二百餘名我軍乘勝越濠追之城賊又出
大股繞小龜山以襲我後李續燾率副右營及湘右
營後右兩哨從旁路橫擊襲後之賊賊遂大潰具逼
斃於沙湖者二百餘名餘賊遁歸於城其由中和門
出城之賊趙克彰率奇字右營張榮貴率榮字左右
營分繞巴頭山截殺逼至賽湖隄首臣卽加派訓營
於南湖湖處並飭南湖舢板於湖汊轟之奇營榮營
勇氣百倍追殺至城下斃賊四百餘名而時已初更
矣臣楊載勳於是日派正前營舢板四隻入洪山東
湖至魯家巷助勦復派都司李濟清率副中營由沙

日出隊往青山防守因青山港有鳧水偷渡入城之
賊李濟清卽率舢板十餘隻入港轟擊斃賊二百餘
名生擒長髮賊十數名其魯家巷援賊三次攻撲均
經蔣益澧等擊退賊不得進十七日僞檢點古隆賢
率賊千餘循城北青山油坊嶺江岸修築土壘臣楊
載福率游擊鮑超都司周清元自沙口出隊至青山
會合李濟清入港轟擊賊於渡口排槍抗拒鮑超李
濟清二營以大礮轟之賊卽退走嶺上鮑超登岸奮
擊李濟清繼之臣楊載福又預派周清元由上青山
登岸抄出賊後夾擊嶺上之賊賊卽敗退將油坊嶺

賊巢盡行燒燬仍泊外江是夜賊復來上青山河岸築土壘一座以阻我水師又在北油坊嶺渡口築土壘一座並造浮橋以濟城賊十八日魯家巷援賊益多並新添三壘

臣

卽添派訓營副訓營李續賓亦抽

分湘右營二哨湘副右營二哨佐領富新率馬隊百名前往助剿仁營副仁營虎營訓營副訓營分前後隊攻其右寶營及湘副右營之前後哨攻其左湘前營鳳營應之湘左營湘右營攻其中賊亦前後各分三路來拒廬戰三時賊稍卻我軍同時並進立破其中右二壘馬隊馳驟衝殺斃賊約三百名右路各營

乘勝追至黃家店又破賊後路三壘中路各營追至五穀塘而中路敗賊會合石達開接應之賊遂併力致死於我左路之副左寶營副右湘營勢幾不支中右兩路官兵併力策應上下衝殺相持又兩時佐領富新以馬隊衝突十餘次殪其前鋒老賊數十名賊始敗退我軍併力追十餘里斃賊又三四百名奪馬十三匹刀矛旂幟無算生擒賊五十三名是日臣楊載福亦親率陳金鰲李濟清喻吉三攻賊橋壘陳金鰲帶舢板數隻首先衝入港內對賊壘轟擊喻吉三補之李濟清由上青山對岸入湖焚燒白楊橋後賊

巢並截城賊來路其餘各船每船派勇十人由上青山登岸繞出賊後焚燒賊巢賊卽驚遁當將賊壘浮橋概行燒燬復加派舢板五隻人洪山東湖助勦是夜卽派陳金鼇營舢板十餘隻駐紮港內防賊偷搭浮橋賊果夜至舢板奮力擊退十九日賊眾大至復爲陳金鼇擊退賊又以民划二百餘隻潛入南湖岸旁及湯孫湖岸旁翼於夜間放入湖中驚臣後路瞿定國姚教忠於日間嚴守不令入水開礮轟擊斃賊各百餘人賊卽遁走夜半賊懈瞿定國姚教忠焚積薪於他處以疑之而突出百餘人各挾火具登岸焚

其划船殆盡賊不辨官兵之多寡亦不敢來救也二十日城賊萬餘分布於雙鳳山小龜山賽湖隄等處東湖賊船二十餘號由閘橋港直趨魯家巷左壘援賊亦出二萬餘以撲魯家巷各營臣已飭瞿定國先夜以舢板挽人東湖繞擊賊船之後陸師則仁營湘左營虎營湘副右營均以礮沿湖轟之及賊船將近各勇解衣涉淺爭奪賊舟傷斃水賊百餘燒賊船三隻餘船仍奔入港內援賊爲我濠槍礮所阻見船賊已敗卽時退去城賊亦逡巡而退是日臣楊載福聞東湖開仗卽親率各營往青山港會剿外賊內賊大

股齊至夾港而陣約六七千人港面僅容小艇賊以樹木柴草塞於港內已阻水師進攻之路仍出大江駐紮其在洪山之東湖水師本少二十二日張榮貴自備划船與瞿定國之船赴閘橋以小划誘賊賊船不出城賊復於外江擡船繞入東湖而於青山港一帶搭橋二十四日賊又夜由塘角擡船十餘號轉趨東湖飛飭瞿定國搗勦並派正副右營及余雲龍肅廷輔接應奪獲賊船四隻餘船悉焚燬斃賊約三十餘名淹死者無算二十五日副都統銜護軍參領舒保之馬隊三百全數至洪山安營二十六日赴魯家

巷與步軍同審地勢出賊不意踏其一卡斃賊十餘名擒斬僞司馬李光發二十八日援賊城賊四面紛出水陸約七八路其城賊自鷹嘴閣賽湖隄雙鳳山東嶽廟沙子嶺小龜山姚家嶺密灣等處分布殆遍約賊二三萬號叫跳擲吶喝萬狀同時水陸七八處警報紛至李續賓臨大事則安詳堅定如不欲戰令於眾曰有不俟賊近而先出者卽勝亦斬眾軍肅然嚴陣以待約一時許號旂一揮各營齊出趙克彰奮發爭先直擊賽湖隄之大股立斬衝鋒悍賊數名賊稍卻而散立山坡之賊齊力分繞以抄我後蔣益澧

秦冠鑣遂各率其營抄截之護軍參領舒保率馬隊四面衝突賊遂大敗追之至隄賊又反旂而來我軍遂潛伏於山坡田隴中俟其近前突起擊之馬步齊進如摧枯朽如是者二次賊屍滿途約三四百人李續賓率勇由洪山之北而出李續燾率勇由洪山之後循東湖而出以邀截姚家嶺密灣及沙子嶺小龜山之賊分途奮殺賊不能支各路之賊盡併於沙子嶺小龜山以抗我我軍奇正互應左右擊刺呼聲動天莫不以一當百賊亦殊死鬪一股敗退一股繼進酣戰良久馬隊數十騎復橫掠沙子嶺而過檣箭並

發余雲龍亦率勇從東湖繞姚家嶺而上從旁襲之
賊遂大亂紛紛退走馬步齊奮追至小龜山腳惟鮎
魚隄一綫之路敗賊擁擠自相踐踏逼斃於沙湖及
僧礮轟斃之賊約七八百名蔣澤澐朱品隆率勇合
馬隊由正東街進其賊之前鋒已過東嶽廟街者被
各勇突擊敗走追至濠邊以槍礮連環擊之賊退又
以數十人越濠誘其進前而擊之如是者數次馬隊
又合右營之左哨從田隴踰濠橫衝而來蔣澤澐朱
品隆則分勇繞賽湖尾邀擊之追過雙鳳山左右斃
賊亦約二三百名李續賓自小龜山收隊聞賽湖隄

礮聲未已又率親兵馳擊之賊見其旂幟飛奔入城我軍追至城下終爲礮石所阻統計各營斃賊約一千數百名內斃黃衣騎馬賊目數十名獲僞印五顆軍器旂幟無算而是日各路之戰如魯家巷之援賊則張榮貴率榮營合仁營副仁營及鳳虎寶三營分路迎勦馬隊又於城賊敗退後馳十五里飛騎助之踏破賊壘四座斃賊二百餘奪獲賊物無算其下游楊家橋爲沙湖通東湖總路賊以三四百人由塘角迂道來撲則蕭廷黼督勇力戰擒斬長髮老賊四名奪獲黃旗三面擡槍三桿刀矛八件其東湖之賊船

出護陸賊則瞿定國率舢板分兩翼抄之焚賊船三十隻擊斃淹斃之賊共百餘遂轉柁鼠回小港其湯孫湖匿港之賊划則姚教忠轟燬七十餘隻斃賊三百數十名追至舒家橋賊棄船登岸遂縱火盡燒賊划又登岸火賊巢八十餘戶其臣後路可通賊營者凡三相距十里二十里不等環以深溝護以堅壘賊以二三千人分撲守壘者每處不過三百人待其逼近濠壘大礮齊發應聲而倒者一二百人險不可踰故不煩多兵而可守而臣遂得以併力於魯家巷與城前一路也臣楊載福是日亦率李濟清周清元喻

吉三丁泗濱四營水師入青山港進剿李濟清周清
元等首先衝突喻吉三爲後應丁泗濱率勇登岸護
船並進行至上青山地方賊出隊迎敵丁泗濱奮勇
向前殲賊數名身受數傷猶能力戰李濟清連開大
礮轟賊後隊斃賊甚多賊始敗退隨破賊上青山三
壘追至油坊嶺渡口拔其浮橋陳金鼐率船攻塘角
之賊破其一壘奪獲賊礮四尊是日之戰前後左右
各分四路每路又分二三支其賊之大股則專注於
洪山與魯家巷得此大捷賊氣固已挫矣八月初三
日李續賓自率湘右營舒保率馬隊赴魯家巷助剿

派定各營分三路齊進賊亦列陣以迎鏖戰良久賊
抵死抗拒張榮貴躍馬直前諸勇隨之馬隊衝突入
陣賊遂披靡追逐十餘里踏平賊壘六座斃賊六七
百名奪獲銅礮洋礮九尊擡槍刀矛旂幟無算初六
日張榮貴率各營又合馬隊往勦連番誘之賊死守
不出是夜三更偵探賊之後路四營已動賊將遁矣
臣復遣勇士於前面九壘伏聽則稱九壘之中賊聲
甚囂更鼓已亂初七日丑刻卽飭張榮貴會合各營
分三路進勦舒保率馬隊由洪山飛往分三路接應
天尙未明賊不虞我軍驟至隊伍大亂我軍馬步直

逼連踏大壘十三座小卡無數斃賊千餘名漫山徧
野紛紛下竄遺棄壘中大礮擡槍烏槍刀矛旂幟糧
米無算馬步齊力追躡而步隊較緩馬隊遂獨自前
進及於土橋殲其後隊無一脫者及於葛店賊猶列
陣以拒而馬隊馳騁風沙飛揚賊已莫辨追兵之多
少舒保暨各參領整隊衝鋒槍箭無虛賊之奔潰乃
益急七八十里之地無一返顧之賊且有數十賊併
立一處手執長矛目瞪口呆神凝一任官軍斬殺無敢抗
拒者迨追至華容則已百餘里矣計斃賊千數百名
生擒六十餘名其逼溺於內湖者實不可以數計收

隊之後沿途又搜殺數十名奪獲騾馬擡槍小鎗刀
矛旂幟偽印偽冠黃緞馬褂金銀器飾共計千餘件
此七月十六日至八月初七日水陸分攻馬步合剿
并大破城賊援賊之實在情形也該逆石達開之初
至氣醖頗悍仰仗

天威旬日之內大小二十八

仗馬隊之功尤推第一水陸諸軍亦皆用命乃得大
挫逆鋒力窮鼠竄探據脅從解散約計萬餘敗賊現
尙萬餘已至大冶興國而臨江賊首偽侯黃玉崑復
以大眾至興國會合賊情詭秘尙宜嚴防自援賊敗
走後城賊倍形消沮臣於初九日卽嚴飭水陸並進四

面合攻前此血戰於野傷亡不過百人初九初十
一二三等日竭力仰攻無一賊出城迎敵傷亡乃三
百餘人則以攻守異勢也游擊劉錫文奮勇素著首
先爬城中礮而顛守備李登闕直逼城隅礮斷左手
腕成廢惟軍氣方壯眾心益堅必當倍加激勵誓復
堅城以紓 聖念所有統帶馬隊之副都統銜護
軍參領舒保忠勇冠軍所向無前可否 賞給勇
號統帶湘營之鹽運使銜記名道安慶府知府李續
賓樸誠堅毅忠勤懋著每當大戰整暇安詳尤見真
實力量可否 賞加升銜藍翎都司何紹彩兵陣

嚴整每戰皆捷力能捍禦強賊可否

賞換花翎

免補都司以游擊儘先升用其餘馬步尤爲出力員弁兵勇除馬隊另繕清單外所有水陸各營可否彙案保獎出自

天恩其力戰陣亡黑龍江六品藍

翎甲兵倭索爾札嗎立付善烏勒希遜甲兵依郎阿已彥吉爾嘎應請照驍騎校例議卹陸師游擊劉錫文應請照參將例議卹水師把總晏光明顏真彥藍翎外委李升剛陸師守備銜把總艾文軒把總李啟相黃武泰唐永飛外委蘇文炳陳龍開田福勝陳文昌孫連升唐隆保傅正榮李得輝丁光彩朱萬勝黃

良仕陳紹林均請照例從優議卹水師擬保外委朱朝青黃建四金太和黃吉亨羅起富陸師擬保外委嚴得標周南桂袁正華六品藍翎何連勝已革湖南提標左營把總楊慶春均請照外委例從優議卹守備李登闢戰功素著因傷成廢可否 敕部覈議

比照實缺守備例在籍食俸以養該員之餘年出自恩施逾格其餘陣亡勇丁容另查明咨卹

謹按疏內請獎卹各員於八月二十九日接奉
旨準

再水陸各師攻剿火葯尤屬要需近因粵省解到夷

礮三百尊其舊存南礮並奪獲賊礮勻派水師及陸路礮卡計共有礮一千一百餘尊前因援賊大股出後路夾襲城賊同時並出四路齊攻戰無虛日七月所需軍火每月多至十萬觔現又於湖南省局添造拖罟快蟹船隻配用四批夷礮爲分兵下剿之計相應請

旨敕下四川陝西湖南各督撫

臣

按月籌

解火礮各三萬觔三省合計每月九萬觔按月初旬批解起程赴

臣

營交納以資攻剿謹附片陳

奏

諭武漢逆賊負隅已久據官文胡林翼奏報疊次擊敗大股賊援城中之賊勢已窮蹙是兩城計日可克乃南

岸自八月初七日擊敗石逆以後兩月未見動靜北岸自八月二十七日擊敗下游援賊以後亦但以嚴遏外援爲詞何以於進攻機宜仍復漫無把握現聞金陵城內賊黨相殘楊逆被洪韋二逆所殺石逆不服逃出金陵洪逆懸賞購石逆首級是石逆之不返金陵已可概見此等傳言湖北當有所聞若不乘此機會迅拔二城倘石逆不附金陵自圖占踞必至率其死黨或撲湖北或走江西皆屬可慮現在餉糈日缺調撥維艱所望克復上游即可移師東下由九江而至安慶由安慶而至金陵乘其內亂次第削平兵餉可不加增而成功庶幾

有皇官文胡林翼身膺督師重任須當統籌大局謀勇兼施何得以城堅賊悍爲辭坐擁水陸重兵日久無功若云斷絕接濟可以困賊何以爲時已久尙未藏功恐沿江一帶港汊紛歧接濟仍未能斷絕不過藉口耽延掩其遷延之咎經此次剴切申諭後該大臣等卽當嚴督在事將弁設法進攻迅將兩城克復俾得分兵東下大局冀有轉機如敢仍前延玩必至師老力疲別生變故官文等不能當此重咎也至官文所請吉林黑龍江挑選西丹一節已諭知各該將軍酌量照辦矣將此由六百里各諭令知之 十月十九日同督部奉軍機字寄

水師擊燬賊船直抵田鎮並咸甯剿賊大勝疏

十月初八日

臣自剿敗石逆後與楊載福李續賓商酌水師增船
六營陸師增人五千四面長圍務期盡殺乃已嗣接
探報九江安慶新造賊船有陸續護糧上竄者九月
初四日楊載福遂率正前營王明山副右營陳金鼐
副後營周清元新右營丁泗濱由沙口往剿賊船聞
信悉折而下初五日辰刻追及於蘄州丁泗濱周清
元開礮轟擊賊以礮船向前迎敵而以大船護其聯
重穩泊於後陳金鼐王明山遂各率其營飛渡南岸

下駛又急槩上溯以襲其後用大礮突然轟之火箭
火蛋齊時並發賊船不及啟旋丁泗濱周清元又各
率其營從前壓擊霎時火起焚賊船七十餘號斬州
城賊率眾出救而岸下已無一船陸賊之氣先奪楊
載福復令陳金鼇王明山二營每船分十人共計不
滿三百登岸誘賊賊果大隊追之我軍佯走二營礮
船隨之賊追將及則我軍登舟賊勢欲退則我軍登
岸如是者四賊方憤我軍之不急戰而不虞周清元
丁泗濱二營已從下游乘虛入城立斬數賊齊聲一
呼拔幟易幟城外之賊大亂楊載福率陳金鼇王明

山飭其水勇盡數登岸剿殺周清元丁泗濱從城內
殺出前後夾攻斃賊約五六百名平賊壘三座賊遂
踉蹌下竄委棄之器械輜重悉數焚之以舢板不能
運載城中無與爲守也申刻四營全駛至田家鎮賊
船鱗集如前見我軍至紛紛開行楊載福飭各營縱
擊觸礮卽沈著火卽然焚奪賊船八十三號并奪獲
礮船四隻大小礮位二十尊是晚泊該處訊據賊供
湖口安慶新造賊船八十餘號此次以數十隻督押
輜重糧米百六十號上濟武漢盡被燒燬等語初九
日順風回駐沙口此水師迎剿賊船直抵田鎮獲勝

之實在情形也臣營之後南路咸甯縣距營約二百
里自四月署咸甯縣知縣汪靜淵遇賊殉難後援軍
赴江右順道剿賊因委隨營効力之雲夢縣典史黃
鐘鳴代理縣事辦理團練而以把總唐明周德麟等
率勇三百人副之石逆敗後僞監軍葉逆領賊二百
餘竄馬橋柏墩等處黃鐘鳴督勇擊退八月十八日
先鋒賊程學立王大賁等十餘名至馬橋索米揚言
僞兵部尙書魯逆領眾萬餘由江西義甯前來團局
稟聞立于擒斬二十五日魯逆果率眾來犯至通山
交界之小嶺黃鐘鳴卽督集團勇迎剿於三口界斃

賊二百餘名生擒八十五名賊遂敗竄勇丁受傷僅
二十一人九月十五日魯逆復繞道崇陽返竄丁泗
橋距咸城僅三十里黃鐘鳴與訓導蕭道鶴集眾守
城號召各團應援又念賊多兵少援軍未至不如及
其未備而夜襲之遂率唐明周德麟等乘夜往勦賊
不虞我師猝至踉蹌而奔殲斃二百餘名奪獲騾馬
八匹擡鳥槍二十餘桿黎明賊已無蹤我軍僅傷勇
四名惟把總周德麟因隻身先入中鎗陣亡黃鐘鳴
料賊必返收隊亟歸籌備守具一面告急求援一面
授兵登陴賊果覘知兵少卽日直薄城下以千餘賊

踞城南山巔以五六百賊踞西河橋山巔又分千賊
輪環攻撲或附城縱火延燒民舍或高屋施板冀接
女牆周麾而呼援梯而上乍卻乍前吶喝萬狀如是
者三晝夜賴城上槍礮磚石無一虛發擊斃騎馬賊
大旂賊數十人餘賊無算賊計窮力竭遂於十八日
宵遁比臣聞信卽派三千人往援一日夜馳百二十
里未至而圍已解矣圍解之際黃鐘鳴唐明仍率勇
尾追適保康永逸兩團率眾俱至因分途跟剿未十
里而及之月色冥濛賊不辨我兵多少且奔且喘一
任其後隊被截而莫敢回顧天明賊走益急賊路益

歧各團又四面兜合積善團截之於黃石洞親陸團
截之於坐谷塢又截之於蘇家嶺又分截之於馬橋
城勇與其地團眾又夾擊之於柏墩則已五十里矣
賊之旂幟刀矛槍礮等物拋棄殆盡搜捕零星又擒
斬賊數百名是役也魯逆挾三千餘眾其倖而逃去
者僅三四百人均竄興國此咸甯縣殺賊守城以少
勝多之情形也黃鐘鳴以典史代理斯邑勇僅三百
殺賊多次其大股來犯竟能不候援至力保孤城良
由官吏相孚先有與城存亡之志故士民不致奔潰
亦可愧夫聞警先逃棄城不守者是水師之轉戰無

前每右意計之中而黃鐘鳴之出奇制勝實出期望之外除咸甯各團勇最爲出力者應由臣查明獎勵外所有雲夢縣典史代辦咸甯縣知縣黃鐘鳴可否開缺以知縣超擢仍畱湖北儘先補用監生黃守信可否以從九品畱於湖北遇缺卽補並均請賞

戴藍翎把總唐明可否請以千總畱於湖北儘先補用並加守備銜咸甯縣訓導蕭道鶴可否請加五品銜其屢次衝鋒守城出力之團長六品軍功鎮竟成王自新萬登梯勇目李永章李成珍黃金發李成珠丁昌禮吳全勝子在欽史家云曹福臨廖文光張光

球雷廷雲楊大燁游玉成樊世俊葉榮祥汪啟富李
得勝瞿勝武張永富李隆興莫四進黃勝宏唐國良
可否均請以外委畱於湖北儘先補用並均請

賞戴藍翎其圍城之際捐輸勇糧急公好義附生梅
鳳藻可否請以訓導歸部選用監生丹必達可否請
以未入流歸部選用帶勇團長附生盧定箴監生陳
春藻六品軍功童生鄭遠安可否均請以從九歸部
儘先選用從九職銜鄭法熊可否請加六品銜以示
鼓勵出自恩施逾格其陣亡之把總周德麟請
照例優卹軍功彭宏章請照外委例優卹均候

天恩以慰忠魂

謹按疏內請獎卹各員於十月二十二日接奉
旨準

再臣待罪行閒兩閱寒暑堅城未復軍餉多糜清夜
捫心實深惶悚乃蒙

大股上犯重勞
聖慮飭令湖南救援仰賴

天威援軍未至石逆敗逃因卽連日環攻鄂城乃我
軍肉薄而登城賊折骸以守礮石所加受傷實眾計
惟仍築長圍斷其接濟遲之兩月定可聚殲刻下南
北布置似已周密不致逆徒再進斗米但賊情已見

飢疲而吾軍亦形匱乏則今日之勢未有如軍餉之急者矣臣極知帑項至絀而不免請籲頻仍上煩

宵旰之憂下竭鄰封之餽每一念及幾於無地自容顧形勢如此大局攸關有不敢不備細爲

上縷陳者

臣

與楊載福李續賓水陸之師所部皆南

勇而帶勇之人亦湖南居多南勇之始江忠源統馭

最精曾國藩塔齊布羅澤南李續賓繼之亦皆厯著

戰功非南勇之材技果勝於他軍也南省人多刻苦

登山涉水是所慣習又稔知粵匪伎倆素無畏心故

攻堅或非所長而野戰未嘗不利其帶勇之人率皆

秉性誠樸無宦場虛浮習氣鄉人子弟甘苦夙共
又特嚴煙賭之禁軍中實無刻減浮冒等情所以士
稱用命令出必行羣以習戰爲固然從軍爲慣事額
軍偶有傷闕羨卒補之從無雜色人等得以闕入其
中數年以來若本省若江西若湖北徵調何止數萬
無如江西南勇餉銀已欠一百餘日臣營餉銀亦欠
八十餘日正餉卹賞共需三十萬兩臣念江西四面
受敵萬一南勇因飢而潰失此勁旅關係匪輕因於
萬分支絀之中撥餉銀一萬兩由湖南遠餽江西實
不敢稍分畛域今楚省南北兩營每月水陸兵勇日

糧及製造一切軍火約需二十八萬金而鹽課釐金等款僅敷十分之二又夏秋亢旱太甚荒象已成額賦錢漕更無冀望該勇等約束有年尙不至以缺餉存心懈其銳氣然厯時愈久積欠愈多前奉

諭

旨特撥山西餉銀十萬兩專濟南師各營鼓奮故三次援賊上犯力挫兇鋒未始非飽騰之力嗣後更奉敕下陝西山西四川每月濟餉如果全數按月解到此外不敷原可從本省籌措無如山陝兩省雖月有所解爲數僅止三萬而川省所解覈以兩月三萬尙恐不得如期日來窘迫情形更難罄述伏查各

省餉路一水可通以四川爲最便而蜀中年穀豐稔
鹽課增額亦較他省爲腴伏求

皇上敕下四川

督臣特指專款撥解楚餉二十萬兩稍補本年短解
之款以清積欠以利遄征更求

諒敕秦晉蜀

省督撫仍按月接濟楚餉五萬兩以發兵勇新糧庶
可藉收一簣之功以贖萬死之罪至

臣

指天誓眾力

復堅城斷不敢以缺餉爲詞稍寬督責上負

覆

載鴻恩所有軍餉日絀懇撥專餉緣由謹附片奏聞

伏祈

皇上聖鑒訓示

再臣派援軍四千一百人交同知銜曾國華統帶往

援江右抵崇通時卽經趕解銀一萬兩錢五千串及
抵湖南瀏陽又先後解銀一萬七千兩以資軍餉嗣
據曾國華稟報入境連復新昌上高二縣圍剿瑞州
迭獲大勝而餉項尙不敷六月聞之實深焦灼臣查
鄂軍水陸各餉積欠已七十日八十日不等籌畫本
艱惟江西餉道更阻湖南赴援江右運濟已多臣因
於捐換牙帖款內籌銀一萬兩於八月二十三日委
解南省轉解謹此附奏以聞

胡文忠公遺集卷十一終

胡文忠公遺集卷十二

張沙鄭敦謹

編輯

沈鄧曾國荃

襄樊匪眾敗竄現飭馬步會剿豫兩軍合力兜

勦疏 六年十一月十一日

竊照南北兩營派撥馬隊訓勇前赴襄樊勦辦匪徒

迭獲勝仗情形由督臣官文會奏在案旋於咸豐

六年十月二十四日承準軍機大臣字寄咸豐六年

十月十八日奉 上諭前因載增等奏襄陽逆

匪回撲樊城當諭官文飭令常恩會同馬秀儒等攻

勦且恐兵力尙單常恩不能得力並諭官文派訓兵
勇另派大員統帶本日據英桂奏該匪竄至鄧州裹
脅焚掠兵勇退守州城卽於初九日失陷此股匪徒
旣竄新野復陷鄧州勢甚猖獗該處逼近南陽僅止
六十餘里而襄陽被困樊城尙爲所踞楚豫兩軍不
能合力夾擊常恩如果得力何至郡城日久尙未解
圍且至蔓延鄰境著官文等察看營中大員如都興
阿等實能帶兵督勦者酌派一員迅速前往統帶馬
步各隊相機攻擊以期得力襄樊得手之後亟應進
勦新鄧與豫軍會合但不可跟蹤尾追驅之北嚮總

宜設法繞出賊前迎頭截擊是爲至要將此由六百
里加緊諭令知之欽此臣查該匪起事之初不過數
百人耳卽時掩擊撲滅何難乃襄陽府縣會營往捕
甫見賊而兵勇先潰槍礮器械盡爲賊有賊膽因之
日張賊勢因之日大旣踞樊城旋圍襄陽其時鹽道
常恩因病遲延在途已革游擊溫發魁師行無備猝
爲賊乘槍礮器械又棄以資賊而賊遂猖獗彌甚設
非馬秀儒等登陴固守則郡城已不堪問矣迨督臣
官交派往之副都統銜舒保等率馬隊馳至人心大
定臣派往之知府唐訓方知縣唐協和率訓勇一千

二百名先後抵襄鹽道常恩等亦均赶到併力攻擊而襄陽之圍始解樊城之賊分股竄陷光化穀城又另股分陷鄧州頃據唐訓方報稱馬隊步軍自十月二十二三等日在紅綾鋪桐樹店等處大獲勝仗後二十六日賊合鄧州賊目史繼策之眾約數千人竄擾清河店我軍趕至接戰馬隊首先衝殺訓勇分兩翼抄擊之殲賊千餘陣擒史繼策餘眾竄匿二十九日馬隊訓勇復分途搜剿各殲賊黨數百並奪獲起事名冊及號補印板等件是役也先後七日之間斃賊不下數千奪獲礮位槍械馬匹旂幟不計其數現

仍相機進剿並探有夥賊分竄穀城之太平店一帶
荊州將軍所派之署松潘鎮德恩已率川兵八百名
前往穀城截擊河南南陽鎮邱聯恩亦率豫兵前往
鄧州堵禦等因臣查舒保訥依琫阿所帶馬隊實屬
勁旅衝鋒陷陣戰績最多而唐訓方等之訓營臨陣
亦尙嚴整足以濟之故所向克捷業已飛飭唐訓方
等迅卽抄截追擊並由臣官文飛飭舒保約會德恩
邱聯恩各率川豫官兵三面合力兜剿以期一鼓而
殲俾根株悉絕不再蔓延爲患所有光化失守及賊
陷穀城當經該縣文武卽日收復容俟查明確切情

形另案分別辦理至隨州近有土匪趙邦璧等藉募
勇爲名希冀聚眾滋事除由臣官文派參將文明帶
兵馳往掩捕外臣已飛調參將鮑超迅帶新勇前往
會辦理合將現飭兜剿緣由會同督臣官文由驛六
百里馳奏

上諭本日據胡林翼奏襄樊匪眾敗竄現飭兵勇約會川
豫兩軍合力兜剿一摺襄陽匪徒本係烏合之眾因兵
勇先潰以致賊勢日張雖經官文等派兵剿擊獲勝而
襄樊之賊竄踞鄧州南陽新野亦有賊蹤必須楚豫兩
省大兵合力兜剿尅期撲滅方不致蔓延北竄既據胡

林翼奏舒保等所帶馬隊唐訓方之訓勇均屬得力卽
著督飭該員等會同總兵德恩邱聯恩三面合擊以期
一鼓殲除其隨州土匪並著嚴飭參將文明等迅速掩
捕勿許觀望至鹽法道常恩係官文特派帶兵剿賊之
員何以遷延不進致有貽誤是否託詞患病希圖掩飾
已革游擊溫發魁師行無備委棄軍械爲賊所得顯有
畏葸逃避情事著該大臣等確切查明嚴參懲辦以儆
怠玩而肅戎行將此由四百里各諭令知之 十一月二
十五日接奉軍機字寄

再本年七月二十日準戶部咨奉

上諭戶部奏

遵旨酌定糧臺奏報支發各款限期章程一摺著照所議於半年開單奏報一次統以六月十二月二十日作爲奏報到部定限倘再遲延卽著查明參奏等因欽此當經行飭荆襄糧臺司道暨隨營水陸糧臺屬雲官等欽遵查照辦理去後茲據襄陽糧臺布政使馬秀儒升任兩淮鹽運使安襄鄖荆道羅遵殿荆州糧臺荆宜施道莊受祺詳稱荆襄兩處自去歲設立糧臺以來迄今兩載收發款項紛繁內有本解北岸軍營而勻分南岸者有本解南岸軍營而又分撥北岸者彼此轆轤往返行查勢難依限辦理且部定

單款前此亦未奉抄發更無憑照造又據隨營糧臺
厲雲官詳稱該臺支放各款業經行飭水陸各支應
之處查辦惟內有轆轤不清者數款如江西水師咸
豐五年回援鄂省事起倉猝所有支發口糧起止月
日因起掟匆遽未準江省移明且有分營由湖南徑
發而後又專與湖北支放者雖係查照章程陸續支
給而澈底清算有無冒領難遽彙查是年八月又奉
侍郎曾國藩派湘營由義甯州援鄂其攻克崇通蒲
咸各縣後卽進紮洪山一應口糧有由江省支領者
有由本省應付者因頭緒紛繁卽移知湘營支應局

同知吳坤修查覆以免兩歧適吳坤修奉派管帶彪
勇兼辦行營糧臺回援江西經手款目致未清虛其
援軍出省時奉撥餉項及抵崇通瀏陽等處委解銀
錢應歸何處銷算亦未準知照而道途梗阻文報難
通迭次專勇守催並委員改裝間道前往均未回營
卽或冒險遄行而會算核查定難依限此支應水陸
款項與江省轆轤之實在情形也應請展限造報各
等情前來臣查糧臺支發款項定限開單奏報特
恐經手之員濫支浮銷虛糜錢糧必應遵照辦理何
敢支延惟臣自去歲正月由江西率師援鄂閱今將

及兩載糧臺分設數處彼此均有軫輶兼與江西糧
臺又多牽涉該司道府等所詳不能依限造報委屬
實情臣濫廁戎行時事之艱餉項之絀均皆目覩親
嘗斷不敢以難得之餉養無用之人臣營章程款日
首重戰功卹賞其按日按營委員簡點卽長夫餘丁
均有定額不準一名短少其糧臺文案差使員弁莫
不一人而兼數事不特濫冗無人亦皆比照舊章薪
水格外撙節惟際此攻勦喫緊款目紛繁人少事多
造報不容草率除嚴飭先將各路糧臺收支大概趕
緊造報外合無仰懇

聖恩俯準展至來年六月

依限造報並請 敕下戶部補發清單款式來楚
俾得查照辦理是否有當理合附片陳 奏仰祈
聖鑒訓示

謹按此片於十一月二十五日接奉

旨準

再部頒捐輸章程係照籌餉及常例酌減二成仍以
每錢二串作銀一兩上兌其捐生不避艱險親自運
送到營上兌者準以一千六百文作銀一兩軍興以
來勸捐已至再三幾於無地不徧近日湖南及荊州
駐防均因籌餉緊急變通議減業經先後奏奉

俞允準以制錢一千六百文作銀一兩上兌而臣等
軍營辦理尙未盡一難期踴躍茲據藩司馬秀儒升
任運司羅遵澂會詳請奏前來臣思攻剿喫緊需餉
孔殷卽將來扼要防堵辦理善後各事必應廣爲籌
畫合無仰懇 天恩俯準將湖北省捐輸比照湖
南及荊州駐防捐輸助餉章程除每兩減二成外準
以制錢一千六百文作銀一兩上兌庶辦理既無兩
岐而捐輸可期踴躍謹會同督臣官文附片具奏
伏乞 聖鑒訓示

謹按此片於十一月二十五日接奉

旨準

設局收捐米石籌濟兵食民食疏 十一月十八

竊湖北省本年夏秋缺雨各州縣多被旱災業經臣

飛飭司道委員確勘分別蠲緩彙詳另行具 奏查

襄陽安陸德安三府及荊門州地居高阜被旱較重

荊州等屬情形稍輕然收成亦皆歉薄民間米糧甚

少市價日形昂貴荊州旗營及綠營兵米向由各州

縣所徵南米撥解咸豐五年分所徵南米不足萬石

本年又值旱災爲數更加短絀綠營兵米積欠之數

亦多被災之區較廣是民食兵食均關係要急須趕

緊設法籌濟查山東江蘇等省均因災歉缺米 奏
準紳民捐輸米石給予職官職銜今湖北情形相似
擬卽仿照辦理現湖北米價自每石三千至四五六
千不等本省米糧旣少所賴四川湖南商販接濟勢
須稍加鼓勵方足以示招徠而期踴躍已令捐生每
米一石照案加耗米一斗五升運腳銀三錢五分準
作銀三兩四錢按籌餉事例職官酌減二成職銜封
典遞減二成之數核予職官職銜於水陸通衢處所
委員設局收米各就所近地方撥運旗營綠營及成
災最重之區定限三箇月一卯截數 奏報如蒙

俞允卽飭司道督同委員設局辦理並請 飭

部印發職銜封典花翎藍翎監生貢生各執照以便
隨時填發 臣爲兵食民食急籌接濟起見是否有當
除咨明四川湖南陝西督撫 臣一體出示曉諭並將
請頒各項執照數目開單咨部印發外理合會同督
臣 官文恭摺具 奏伏祈 皇上聖鑒訓示

硃批戶部速議具奏欽此 十一月二十五日奉

襄陽剿匪續獲大勝疏 十一月十八日

臣於十一月十一日業將襄匪敗竄情形具 奏在
案拜摺後續據藩司馬秀儒安襄鄖荆道羅遵殿詳

稱十月二十九日賊擾襄陽西北鄉白家集龍王集一帶副都統銜參領舒保以馬隊疾馳剿之中途遇賊奮力一戰賊卽奔潰追殺數十里斃賊百餘名奪獲器械多件十一月初四日鄧城卓家營等處聚匪數千意圖復撲樊城常恩唐訓方等於初五日黎明出隊由鄧城行至卓家營賊匪分股伏於其村并山岡溝中另股騎馬賊在後督陣我軍列陣而前唐協和領副訓營從左路進唐訓方自領正訓營從中路進常恩督所部從後繼進賊眾大出鏖戰多時掩殺甚眾其藏於屋內者以火焚之舒保親率馬隊兩路

抄殺其計殺斃燒斃者千餘名騎馬賊數名生擒十六名奪獲大黃旗六十面大小鎗礮數十桿刀矛不計其數步隊追至蔡家坡馬隊追至馬家集我軍受傷者七人初七日追剿姜家集而賊已先遁初八日追剿薛家集而賊又由北泰山廟遁楊家集此賊之老巢也舒保率馬隊直前遇賊所殺數十人賊乘我步隊築壘未成左右分撲賊首張文治以楊家集之資蓄啖擒匪八百人助其死命舒保卽整隊迎擊於中路常恩率所部敵其中左一路唐訓方率訓營敵其中右一路又分右後兩哨列營後以防伏而以唐

協和之副營爲接應左右力敵賊悉敗潰惟中路賊勢頗悍中左稍卻唐協和躍馬而前手刃數賊唐訓方亟麾右後二哨繼進殺悍賊十餘名中路之賊亦遂大敗斬擒五六百名奪獲無算復經馬隊兜圍掩殺斃賊尤多我軍陣亡弁勇六名受傷者二十五名其殺城之賊自縣城收復以來經署四川松潘鎮總兵德恩知縣孫福海復於回流灣古路嘴盛家塘冷家集均獲大勝現於石花街勦辦餘匪其光化之賊則知縣書紳督集團勇扼勦於城西元妙觀又圍勦於城南馬頭山十一月初二日收復縣城賊奔老河

日書紳會合富隆武礮船夾勦大勝老河口市鎮亦
經收復等情前來臣查該匪自十月二十二日以後
迭受大創殺斃不下五六千人光化穀城二縣漸次
肅清賊膽已寒我軍益壯經臣札飭司道隨時曉諭
解散脅從其有立意抗拒結成死黨者嚴飭知府唐
訓方等乘此聲威速行越境追勦並由臣官文飛飭
舒保常恩等即日分途迎勦一面約會德恩及豫省
各軍三面兜剿毋令再行他竄謹將勦匪續獲大勝
情形會同督臣官文由六百里馳奏至武昌賊勢
十分飢困上月以來日夜奔突夜間尤多每次逼近

長濠卽時轟退無一竄逸者其水陸戰勝情形俟收復城池彙報合併聲明

再查水師戰船上年正月由九江回鄂經臣陸續咨

調湖南船局之船並歷次所得賊船其計大小三百

二十餘隻新舊弁勇六千五百餘名除臬司李孟羣

上年九月帶赴中路水勇及臣胡林翼上年九月隨

時裁汰外計存船二百五十餘隻弁勇四千九百餘

名均屯石嘴沌口分布南北兩岸自本年四月火攻

漢陽賊艦先後分撥青山沙口仍以老營駐紮石嘴

沌口以扼大江上下游兩岸而下游水師迭次分攻

九江田家鎮廣濟蘄州等處派防派剿均形單薄節
經臣籌解經費委員馳赴湖南船局添造拖罟快蟹
長龍舳板等船數十隻又於四五六七等月在南添
募水勇二千八百餘名交提臣楊載福添置新營分
布上下游兵力乃敷調遣惟查水軍船隻兩年以來
大小數百餘戰風浪撞擊大礮震盪急應修整以利
追剿各營額設匠役數名僅可隨時驗補若遇大修
則工匠不敷應用卽物料亦多不齊湖南船局遠隔
重湖往返需時恐誤防剿臣與署提臣楊載福悉心
商酌應就近在湖北漢陽上游設立修船廠由臣

委員督率工匠查取船隻之急應速修者先行辦理
於防剿大局不致曠誤而異日乘風下剿不致因船
隻待修坐廢歲月寔於軍務有裨其修船工程統俟
事竣歸於軍需項下核寔報部理合附片陳奏
硃批就近辦理甚屬妥協欽此 十二月初四日奉

奏陳官兵克復武昌并分兵迅取武昌縣興國
州大冶縣等處事宜疏 十一月二十三日

竊臣於八月初七日追剿逆賊石達開旋即攻城未
下徒傷精銳因添募陸勇五千添建水師六營水師
護軍四營爲長圍坐困之計以游擊張寅恭領九營

扼青山之要而以團練四千人伏於村落之外以參將張榮貴領四營扼守石嘴之要以團練四千人助之其長濠各寬二丈深如之外護土城其臣胡林翼五里墩之營與李續賓洪山之營繼長增高日加深濬其魯家巷之濠壘高深各二丈餘以游擊趙克彰等統之賊之米糧既斷信息難通直至十月十五日漸以飢疲遂於十五十六十七并二十二二十三等日夜間奔突冀得一逞臣等四路營壘排礮轟擊每夜必傷賊數百賊亦無一旁竄者十月二十六日臣楊載福率領下游水師七營並護軍四營進攻武昌

鮎魚套漢陽南岸嘴賊船參將王明山守備宋美憲
以水師由南岸嘴溯流上擊把總丁泗濱游擊李濟
清以水師由塘角至黃鶴樓過江從上下擊游擊陳
金鼇把總易景照游擊周清元由江之中流直上擊
賊之腰賊之沿江陸壘槍礮如雨參將王明山首先
衝入右手已被火箭燒傷血戰不退陳金鼇周清元
繼進其丁泗濱一軍從上衝入宋美富李濟清易景
照繼進賊不能支奪燒戰艦共二十餘隻輜重船三
十餘隻王明山獨奪舳板五隻丁泗濱獨奪舳板長
龍各一隻先是四月二十八日火攻之後僅餘武昌

賊船三十號該逆復於城內折毀大屋梁木改造船隻至是焚燒殆盡所餘賊艦尙有十二隻十一月初一至十四日賊分股各一二千人出城夜襲我營均經臣營及李續賓等營擊敗十五日辰刻賊分四路各出五六千人背城決戰臣令同知邢高魁率訓導李景湖鄒漢章都司楊德武參將朱品隆都司李續燾等各路迎擊殺賊一千餘人奪騾馬六十餘匹刀矛旂幟千餘件賊奔入城臣官文偵知賊勢實已窮蹙咨會臣等水陸剋期大舉臣與臣楊載福李續賓即定水陸合剿之計於二十二日辰刻水師則上下

夾攻以六營自上下擊而以楊明萬之大戰艦爲先鋒以七營自下上擊而以周清元之大戰艦爲先鋒臣楊載福自行督陣指揮是日大風揚沙波濤洶湧水師乘風破浪左右轟擊將賊之攔江鐵鎖斫毀其贖存戰船逐一燒燬片帆不存賊計已窮賊飢實甚乃於巳刻洞開各門一股由塘角撲青山之營張寅恭率各營禦之一股由花園撲石嘴之營張榮貴率榮字左右兩營禦之周瑞率安勇橫抄之一股由八步街繞出五里墩大營臣令同知邢高魁與游擊葉永泰率訓導李景湖鄒漢章都司楊德武都司銜金

殿安五營禦之一股由長虹橋直撲五里墩大營臣
令守備胡達萼徐統恩把總唐飛舞何慶先縣丞丁
銳義五營禦之一股由小龜山撲洪山之右一股由
賽湖隄撲洪山之左一股由東嶽廟撲洪山之前李
續賓以參將周寬世率湘後營訓導蔣澤灃率湘中
營參將朱品隆率湘前營勦右路以國子監典簿蔣
凝學率湘左營游擊何紹彩率正仁營勦左路以游
擊胡裕發率湘副左營隨李續賓自帶之湘右營勦
前路以參領富新率馬隊百名又飛調魯家巷兩營
及東南兩湖水師以爲策應待其逼近始突起擊之

鏖戰約三時之久士氣奮厲賊始大敗狂奔諸勇乘
勝猛追午時入城沿街縱殺火燄騰空血流徧地殺
斃溺斃燒斃約一萬餘名生擒僞檢點古又新賴集
興指揮周宏元將軍陳得高鄧世俊黃開發及軍帥
旅帥總制僞典官等五十四人先鋒黨與八百餘人
當卽駢誅生降四十餘人均交中軍參將及江夏縣
管押俟訊明是賊是民分別辦理其城內應辦安撫
事宜并上年二月死事忠骨由臣次第清釐另行
奏報查各路衝出之賊被我勇攔截勦殺無一脫者
而逼溺於湖港爲水陸所蹙者尤多惟下游東湖沙

湖涸處有踰積屍而鳧水得脫者武漢旣已同日克復臣卽檄水陸各營并交楊載福李續賓統率卽夜四更分三路追剿期與團練合力悉數殲除又探得江西武甯竄匪六千餘人屯聚興國州境覘望狐疑尤應遣將先行剿除并力蕲黃以冀全境肅清布政使銜記名道安慶府知府李續賓功績最偉管帶馬隊參領富新奮勇當先可否均懇 皇上恩施總

理營務最爲精密之候選同知邢高魁可否免選本班以知府用於湖北儘先補用並 賞戴花翎其奮勇殺賊尤爲出力之參將朱品隆張榮貴可否免

補參將以副將儘先補用游擊何紹彩可否以參將
仍留湖北儘先補用并加副將銜藍翎都司李續
可否免補都司以游擊留於湖北儘先補用並請

賞換花翎訓導蔣澤澧可否免補訓導以知縣儘
先選用並請 賞戴藍翎水師參將銜儘先游擊

周清元手中礮子毅然不退可否以參將儘先選用
並請 賞加勇號加副將銜參將銜儘先游擊陳
金鼇戰功最著可否以參將儘先選用並請 賞

加勇號加副將銜儘先參將王明山忠勇可恃可否
以副將儘先升用並請 賞加勇號其餘在事出

力文武員弁兵勇容俟查明另行保獎仰候 天
恩以昭激勸所有首先入城陣亡之藍翎千總羅春
和請照守備例卹藍翎把總會謀績彭正興請照千
總例卹藍翎外委劉致祥外委許鏡清請照把總例
卹其餘陣亡受傷弁勇計五百餘名容再詳查分別
奏咨請卹

上諭胡林翼奏官軍克復武昌省城由八百里馳奏一摺
此股逆賊負隅日久經胡林翼激勵將士前後數十
戰無不克捷遂將該城克復逆眾被殲淨盡辦理極爲
得手白應立沛恩施以昭懋賞胡林翼著補授湖北巡

撫並賞給頭品頂戴總兵楊載勳著賞加提督銜布政使銜記名道安慶府知府李續賓著記名以按察使用參領富新著賞給副都統銜候選同知邢高魁著免選本班以知府畱於湖北儘先補用並賞戴花翎參將朱品降張榮貴均著免補參將以副將儘先補用游擊何紹彩著以參將仍畱湖北儘先補用並賞加副將銜都司李續燾著免補都司以游擊畱於湖北儘先補用並賞換花翎訓導蔣澤澧著免補訓導以知縣儘先選用並賞戴藍翎其餘在事出力員弁兵勇著胡林翼查明保奏陣亡之千總羅春和著照守備例議卹把總會謀

續彭正興均著照千總例議卹外委劉致祥許鏡清均著照把總例議卹

上諭胡林翼奏克復武昌府城出力各員懇恩獎勵等語參將銜儘先游擊周清元著以參將儘先選用並賞給駢勇巴圖魯名號賞加副將銜參將銜儘先游擊陳金鼇著以參將儘先選用並賞給鼓勇巴圖魯名號賞加副將銜儘先參將王明山著以副將儘先升用並賞給拔勇巴圖魯名號欽此

上諭胡林翼馳奏十一月二十二日水陸大舉克復武昌省城覽奏欣慰已明降諭旨將胡林翼等分別加恩矣

據摺內所敘有武漢同日克復之語諒官文當已奏
在途如果南北兩岸均已肅清所有水陸各營自應分
撥進剿卽已克之兩城亦應留兵防守胡林翼現擬派
兵直下武昌縣及大冶興國等處並力剿蕲黃以期肅
清全境當此聲威甚盛諒此等零星竄踞之賊不難克
日掃蕩從此建瓴東下江西安徽兩省均關長江大局
究應先從何路進剿近且江西撫建兩府官兵連挫湖
南兵勇雖已克復袁州而崇通一帶終未一律掃除今
又聞義甯竄匪屯聚興國是江西待援情形實爲喫重
著官文胡林翼迅速會商卽將如何分撥如何酌留之

處妥籌具奏所有善後安撫事宜並酌該督撫悉心酌辦將此由六百里加緊各諭令知之

督部奉軍機字寄

再臣前在九江時所帶楚勇黔勇口糧均係兵部侍郎

會國藩行營糧臺支發上年正月率一千八百

人回鄂因攻勦萬紫又陸續在湖南添募數千人水

師援鄂復添楚勇數千人均經奏明聖鑒在案

九月間又經會國藩派湘勇一軍由江西義甯州援

鄂所需月餉應蒙皇上飭部籌撥隨時接濟惟

查楚勇之出省打仗防自前安徽巡撫江忠源因各

勇果敢用命屢著戰功江忠源亟欲激勵行閒勇糧
優厚計每勇月支給銀五兩及四兩八錢不等嗣會
國藩奉 旨幫辦湖南團防以本省鄉勇防堵本

省地方卽酌量核減四年率師東征較團防章程加
增而視江忠源所發章程仍大加核減計每勇一名
日支銀一錢五分長夫月支銀二兩四錢自岳州武
漢先後克復勦辦得手卽亦未便議減此楚勇章程
經會國藩悉心擬定之原委也 臣到鄂後仍思核減
以節糜費惟業經支發年餘而各勇又均出力不得
不仍前支給以作士氣 臣受 恩深重值此經費

維艱何敢不力求撙節無如本年湖北錢米各價無不昂貴積欠口糧又多至三月之久若再議減實屬不敷食用合無仰懇 聖恩俯念楚勇尙爲得力

所有 臣營水陸各軍仍準仿照會國藩原擬章程支給庶該勇等益知感奮於勦辦大局寔有裨益是否有當謹附片 奏請 聖鑒訓示

上諭胡林翼奏請將隨營勇糧仍照舊章支放等語胡林翼所帶水陸各軍勦賊尙屬得力現在該省錢米各價均形昂貴著準其仍照會國藩原定章程每勇每日支銀一錢五分長夫每月支銀二兩四錢以示體卹該部

知道欽此

月

日奉

恭謝

天恩疏

十一月二十八日

竊臣

猥以菲材渥膺

殊寵望江漢而未周歲稔

由監司而遽攝封圻更蒙

特假兵符

命之

專討雖戮力已逾百戰而頓兵瞬及二年幸承

宸畫之重申得復堅城於一旦顧恢疆尺寸方慚奏

績之遲而竭帑錙銖尤懷積愆之厚乃蒙

異數

特予隆施秩晉頭銜

恩若山而滋虞鼇戴

任邀

心簡撫斯土而彌愧鵷濡凡茲

溫眷

之有加實爲意念所不到

臣

惟有力圖蕩埽勉矢薪

勞冀海宇之安恬願機槍之淨息進甲士而遍宣
德意俾挾纊則益肅戎行集寅僚而周示
恩庶同袍者咸知鼓舞

明文忠公遺集卷十二終

胡文忠公遺集卷十三

長沙鄭敦謹

編輯

湘鄉曾國荃

水陸追勦克復武昌縣黃州府城池仍卽乘勝

東下疏

六年十一月二十九日

本月二十二日武漢同日克復均經臣等專摺奏

報在案

臣胡林翼卽夜檄飭水陸各營交署提臣楊

載福記名道李續賓總統於二十三日丑刻拔營分

三路追勦其由密灣出東興洲一路則游擊何紹彩

守備朱希廣黃勝日把總何慶先各率所部橫截之

計殺賊四百餘名其由雞窩胡家墩一路則游擊張寅恭守備秦冠鏢余雲龍把總蕭廷輔從九龔繼勳會同何紹彩尾追計殺賊一千餘名其由魯家巷繞出葛店一路則李續賓自率湘右營湘中營參領富新率馬隊百名參將朱品隆周寬世率湘前湘後營游擊趙克彰胡裕發率奇右副左營都司李續燾率副右營典簿蔣凝學率湘左營分伏道旁迎頭截殺二十三日賊猶在逃喘息未定我軍突至於其前追兵邀擊於其後賊遂左右亂竄李續賓等馬步齊出賊匪自相踐踏計轟斃殺斃一千餘名溺斃無算惟

此地形勢遼闊恐其尙有逃遁卽下令丑刻拔營乘其驚魂未定沿途搜殺及於樊口賊爭先渡水急將浮橋燒斷其未及渡者又殲四百餘名淹斃港內者無算敗賊已踞武昌又糾武昌縣城之賊踞城西之山岡築其舊壘以圖抗拒李續賓令知縣林之華汎舟方寅山各率練勇爲鄉導夜造浮橋乘勢攻取橋成而楊載福之水師已至游擊李濟清首先焚奪賊舟用大礮對壘連環轟擊賊遂大亂李續賓率各營以攻賊壘李濟清率水師以攻城北并令水勇登岸以噴筒火箭齊力攻城隨由北門攀躋而上李續賓

率陸勇出西門殺入賊卽由東南門竄出適丁泗濱等礮船駛至對岸橫擊諸勇又由羊欄湖截殺追奔十餘里而返計殺賊三百餘名奪獲大礮九尊馬八匹器械二百餘件此二十三二十四日水陸各軍追賊二百餘里克復武昌縣城之實在情形也武昌縣對江爲黃州府城楊載福率水師先於二十四日申刻將黃州城下賊船盡行焚奪並破其水壘四座李續賓令各營於四更渡江潛伏江邊二十五日賊見水師泊岸不知我陸師之夜渡也遂於一字門清沅門出二千餘人撲我水軍我軍待其離城較遠伏勇

突起賊眾大亂不能入城我軍縱橫衝擊守城之賊
驚惶無措水師亦繞道上岸從下游入城臣都興阿
之馬步各軍均同時迅擊乘勢掩殺斃賊無算又追
殺二十餘里計其斃城一千餘名奪獲礮位百餘尊
騾馬四十餘匹旂幟器械無算此二十五日水陸克
復黃州府城之實在情形也又據江夏縣太二里團
總耆民張國煜張國寶張國清張國瑞張國亮劉昌
祺稟稱該里奉札團練設卡以杜竄逸於二十四日
有竄匪三百餘人晝伏夜行薙髮潛逃經過卡房該
團集眾圍殺盡數殲除并生擒武漢管帶水賊頭目

偽二十檢點辛成金武漢賊目秋官副丞相鍾廷生
偽指揮李積芳范勝潘金水胡新法六名奪獲金銀
裘馬等件解送臣營審驗經臣親自訊問並傳投誠
之人環質確鑿無疑臣查辛成金等之賊船業已片
帆不返乃復薙髮潛逃訊係金田村起事要犯當於
二十八日寸磔梟示並將賊賊發給團練充賞又據
橫山招賢等里續緝縛逸匪二百餘名解營正法此
二十四日江夏團練獲犯之實在情形也至武昌縣
城逸賊經富新率各營馬隊於二十四日夜四更東
下窮追又經臣官文添撥巴克坦布馬隊一百五十

名渡江也武昌縣續同進剿李續賓於二十六日黎明仍由黃州渡江率領各營進剿與國大治卽擬直入九江楚境似可尅期肅清臣思賊之善守已成慣技官軍剿賊每苦遲鈍待其守定而攻之則曠日持久乘其驚懼而取之則事半功倍兵貴神速理固如是惟臣都興阿之馬隊與臣之水陸各營均欠餉甚鉅行營未裹三日之糧而兩日之間追剿二百餘里連復府縣兩城實皆馬隊將領倡率勇敢專意殺賊口不言錢而記名道員李續賓參領富新等忠勇冠軍蹕厲風發尤屬可嘉所有記名道李續賓參領富

新二員可否仰懇

皇上恩施逾格出自

聖

裁其在事出力員弁兵勇可否由

臣

查明另案獎勵

江夏縣太二里耆民張國煜張國寶張國清張國瑞
張國亮劉昌祺團練殺賊緝獲竄逸賊渠可否均請

賞給六品翎頂署武昌縣知縣林之華武昌汛

把總儘先千總方寅山隨同殺賊獲勝弁隨同克復

縣城可否均免治罪仍請革職畱任以觀後效出自

聖恩

上諭胡林翼等奏追剿賊匪獲勝克復武昌縣黃州府二
城一摺著胡林翼等乘勝進攻盡殲醜類勿畱餘孽

除李續賓富新二員業經加恩外其在事出力員弁著
胡林翼查明奏請獎勵江夏縣民張國煜張國寶張國
清張國瑞張國亮劉昌祺團練殺賊並獲賊渠均著賞
給六品翎頂署武昌縣知縣林之華武昌汛把總儘先
千總方寅山隨同殺賊克復縣城均著免其治罪仍革
職留任以觀後效該部知道欽此 十二月十四日接奉

再 臣 胡林翼之陸營水師營均交署提督楊載福記
名道員李續賓統帶與江甯將軍都興阿之馬隊乘
勝東下而欠餉已百餘日行糧無出 臣 前奉 諭

旨飭四川專濟 臣 軍十數萬兩現準川督咨報解三

萬兩未到卽令速到萬難敷衍且追勦甚速離鄂漸遠不特轉運爲艱而得力之兵又經屢勝竟虞枵腹雖都興阿楊載福李續賓均能約束士卒不致停兵以待然非有成數大餉必不足以清積欠而利遠征合無仰懇 天恩 敕下四川督 臣 迅將前奉

諭旨專撥十餘萬之餉全數速解並懇 敕

下山陝撫臣除月餉外陝西加解銀十萬兩山西加解八萬兩均宜作速一起全解專濟都興阿馬隊楊載福水師李續賓陸營及 臣 營精銳之隨同東下者以利遄征而作士氣 臣 糧臺應改設武昌省城所有

四川山西陝西之餉均祈

諭令各省撫臣徑解

臣營糧臺由

臣

遴員速運勻撥

臣

爲迅速追剿起見

是否有當理合片

奏伏祈

聖鑒訓示

再

臣

接據署安陸府知府桂茂稟稱隨州土匪趙邦

壁滋事署漢黃德道文輝參將文明統帶馬步兵勇

均由德安進剿安陸郡城惟都司咸恆把總魯際雲

管帶川勇三百名來郡並無槍礮十九日探得隨州

官軍獲勝二十日突有大股賊匪竄入安陸府城把

總魯際雲之勇先已潰散桂茂與京山知縣裴紹箕

籌商進剿之策等語

臣

查土匪起事原不難於剿除

無如本省兵勇怯懦文恬武嬉習爲故常實深憤恨
臣當卽派鹽提舉銜丁銳義訓導鄒漢章率千四百
人以中軍參將葉永泰統之星夜兼程由沔陽潛江
沙陽迎頭截殺又飛飭參將鮑超率所部勇丁迅卽
飛赴荊州府卽由荊門州迎擊務期迅速殲渠解脅
以復安郡毋使滋蔓除將失事文武另行查辦外理
合會同督臣官文附片馳奏

乞蠲緩各屬本年應徵錢糧各項疏

十二月初

三日

竊照湖北省本年自夏徂秋雨澤稀少各屬高阜田

禾蹊乾黃萎被旱較廣又江河水漲以致低窪田地
被淹先後接據該州縣稟報均經批行藩司移飭該
管道府督同印委各員周歷查勘並將查明受旱災
撫大概情形 奏明在案除最重之襄陽德安二府
本已受旱成災復因襄陽縣隨州均有匪徒滋擾光
化穀城棗陽均州宜城南漳安陸隨州雲夢應山應
城各州縣或近切賊氛辦理防剿或間被賊擾民情
本屬瘠苦茲更遷徙流離應將錢漕一律緩征又武
昌府屬之江夏縣漢陽府屬之漢陽縣被水受旱兼
之賊擾過甚請將本年錢漕一律豁免以紓民困現

已另摺

奏懇

恩施並武昌府屬之武昌咸甯

嘉魚蒲圻崇陽通城興國大冶通山黃州府屬之黃
岡蘄水蘄州黃梅廣濟等州縣迭被賊擾應俟全楚
肅清彙入全省善後案內查辦卽陽宜昌施南三府
得雨較早無礙收成興山縣雖有水患已在收成之
後且旋即涸退毋庸查辦外所有前據黃安黃陂孝
感麻城羅田漢川沔陽鍾祥京山潛江天門江陵公
安石首監利松滋枝江荊門等州縣或因受旱或因
被水或因水旱頻仍陸續稟報均經委員馳往會同
勘明由該管道府議稟除各屬稟內可以照常征收

之處仍卽催征並天門縣多多等十六垸盧埠左腦
等十七垸老獅黑市等八十四垸花臺二郎等三十
三垸西隄等十九垸內有收田地照常征收外實勘
得黃安縣受旱日久西北二鄉之東煙等二十六會
成災十分東南二鄉之松溪等二十四會成災七分
黃陂縣麻老宋等共二百二十九會成災七分孝感
縣尙義等一百二十會成災七分又沔陽州本屬水
鄉向不畏旱邇年因鍾祥縣獅子口潰口因屢年賊
擾未築致水勢下注加以本年夏秋之間雨水不多
湖河皆涸受旱之甚從來未有實勘得張家七里等

共四百一垧成災六分其餘受旱被淹各州縣均勘不成災所有應納本年銀米隄閘河費蘆課開丁租餉等項請分別蠲緩以紓民力等情開列垧區村莊名摺由藩司馬秀儒署糧道張曜孫議詳請 奏前來 臣等伏查州縣如遇水旱災傷例應勘明成災分數將被災軍民分別撫賑蠲緩惟庫藏支絀異常軍餉不繼實難籌辦撫賑前已 奏明通飭被災各州縣勸諭殷實富戶各就災區隨地周濟妥籌安撫已據各該州縣稟報遵辦是災民糊口有資不致流離失所毋庸動項撫賑第成災之區顆粒無收困苦異

常實堪憫矜其勘不成災各處亦皆耕穫失時收成
歉薄且逼近賊氛之地辦理團練增剿按田捐費民
力頗形拮据自應分別豁免蠲緩銀米以廣
仁而示體恤除擬緩本年漕糧現已另摺請
外合無仰懇 天恩俯準將成災十分之黃安縣

西北二鄉例得蠲免銀米十分之七成災七分之東
南二鄉例得蠲免十分之二者念該處屢次越境擄
賊民力窘艱萬分連蠲贖本年新賦銀米全併豁免
成災七分之黃陂縣麻老宋等二百二十九會孝感
縣之尙義等一百二十會應征本年銀米各照例蠲

免二分成災六分之沔陽州張家七里等共四百一
垧應征本年銀米照例蠲免一分蠲贖銀米及例不
併免漕米並孝感勘不成災之觀善尙文等八十二
會又逼近賊氛並受旱被淹較重之麻城縣東北鄉
七十三區羅田縣平鄉栗子坳等多鄉下臺寺奉鄉
七里牌等六十區漢川縣喝城等三十三垧販鍾祥
縣蕭家店龍山觀楊林寺一百九十村莊京山縣高
家鴨山等一百一十七團潛江縣楊湖崔家等七十
八垧天門縣關廟多多盧埠左腦老獅黑市花臺二
郎西隄等各垧內較重之區江陵縣洪化橋龍隄等

三百五十一垧公安縣毛一起一等二十里石首縣
一都九嶺等四十一坊琿監利縣永固等並頻年積
淹之崇林等二百三十五垧松滋縣中二等入都甲
枝江縣上百里等二十洲琿荊門州七里等二百七
十四區各應征本年新賦錢糧南米隄閘河費開丁
租餉等項一併緩至來年秋後成災者分限兩年帶
征未成災者統限一年帶征又受旱被淹次重之漢
川縣花林甲廠等十四垧畷潛江縣之鄉東等十一
垧監利縣之張家等三十五垧松滋縣之下三等四
都甲各應征本年南米照常征收請將本年新賦銀

兩緩至來年秋後限一年帶征又公安縣之赴一等
四里監利縣之六合等四十八垸各應征本年新賦
銀兩照常征收請將本年南米緩至來年秋後限一
年帶征其有武昌等衛被水受旱已未成災軍田應
蠲緩銀米均照屯坐各州縣一律辦理再漢川江陵
公安石首監利等五縣本年壓征咸豐五年蘆課或
因被水蘆根浸泡腐爛或因乾旱太甚蘆葦未能長
發所有壓征銀兩一併緩至來年秋後限一年帶征
又本年被災各屬內有咸豐三四五等年並節年因
災緩征銀米本年應復請展緩之處並本年新賦照

常征收之處有因收成稍薄請將帶征銀米遞緩者
因成豐三四五等年應行蠲緩銀米楚北省垣迭次
失陷文案被焚未經查辦前已 奏明俟楚境肅清
勒限辦理是以本年被災各屬僅就本年水旱輕重
情形分別蠲緩之處辦理其有應請遞展並征新賦
而請遞緩帶征者應請如前 奏俟楚境肅清查辦
除飭取被災各屬災分頃畝冊結照例 題報外所
有勘明受旱被水成災分數及勘不成災輕重情形
擬請分別豁免蠲緩錢糧南米等項緣由理合恭摺
具 奏伏乞 皇上聖鑒訓示再此案係因武漢

軍務緊急司道相距均遠又兼襄陽隨州匪徒滋事
竄擾無常各屬文報道路梗塞駁查往返實難依限
彙齊辦理例限已逾災務重大謹飛章由驛五百里
馳奏合併陳明

謹按此疏於十二月十八日接奉

旨準

再江夏漢陽二縣本年受旱情形原次於襄陽德安
等府惟二縣爲武漢首邑賊匪久踞蹂躪較他處更
甚遷徙流離農業多荒直至本年三四月間始陸續
旋里播種又值旱災秋成失望低窪之處復被水淹

實屬困苦異常而各鄉士民恨賊滋擾義憤常伸六
七月以來官軍長圍困賊修築濠壘悉皆踴躍從公
甚資其力以息戰士雖酷暑烈日無一告勞猶復力
辦團練堵剿竄匪昨於武漢克復後緬獻偽丞相偽
檢點將軍數逆首解營訊明正法不使罪惡昭著之
犯倖逃羅網其幫同官軍隨地圍拏臨陣殲斃之賊
不下二千餘名是該二縣士民於顛覆流離之餘益
矢同仇敵愾之志實屬深明大義允宜
渥沛恩

施用示體恤而昭激勸合無仰懇

天恩俯準將

江夏漢陽二縣應納咸豐六年錢糧漕南二米等項

一併豁免以廣

皇仁而蘇民困其有咸豐三四

五等年因賊滋擾並水旱歉收應行查辦蠲緩各款
仍照前奏俟楚北全境肅清再行辦理是否有當
理合附片具奏

謹按此片於十二月十八日接奉

旨準

再漢川縣屬官軍立營挖濠不及栽插地畝前經臣
官文示諭蠲免上下忙錢糧其新溝至曹家河一帶
踐踏各處蠲免上忙錢糧以示體恤在案嗣據代理
漢川縣知縣曹福增詳稱該縣向來完納地丁章程

戶柱應完二錢以上者方剖上下忙分完其一錢及
一錢有餘之戶歸上忙全完一錢以下及分釐小戶
統歸下忙完納今僅免本年上忙該小戶未免虛邀
惠澤應請免分上下忙一概歸入上忙造報蠲免俾
貧苦小民均沾實惠等情造具蠲免戶柱銀米數目
清冊由藩司馬秀儒署糧道張曜孫詳請附 奏前
來 臣等覆核無異合無仰懇 天恩俯準將漢川
縣因立營挖濠不及栽插地祿之田正秀等一百二
十四戶應納本年正銀二十四兩七錢七分一釐四
毫悉予豁免又新溝至曹家河一帶因踐踏之大戶

吳延等一百三十四戶應納本年上忙一半銀二十
二兩一錢三分九釐五毫悉予豁免其餘下忙一半
與南米均歸下忙照常啟徵又小戶周月明等一百
四十三戶歸入上忙共免銀六兩五錢四分六釐九
毫又更名錢糧漁銀之大戶張意元等二十一戶應
納本年上忙一半銀一兩一錢三分二釐四毫悉予
豁免其餘下忙一半銀兩仍歸下忙照常啟徵又更
名錢糧漁銀之小戶胡之邦等七十戶歸入上忙共
免銀三兩六錢一分二釐九毫又蘆課錢糧例不分
上下忙完納之張光璽等四十八戶共銀四兩三錢

一分八釐六毫亦悉予豁免總共免銀六十四兩五錢二分一釐七毫又並田正秀一百二十四戶內南米三石一斗六升九合五勺理合附片具奏伏乞聖鑒訓示

謹按此片於十二月十八日接奉

旨準

乞緩徵被災各屬本年漕糧疏 十二月初三日

竊照道光二十七年準戶部咨嗣後蠲緩漕糧於地丁摺外另行具摺候旨遵辦等因在案查湖北省本年自夏徂秋雨澤稀少各屬高阜田禾曠乾黃

萎被旱較廣又江河水漲以致低窪田地被淹除最重之襄陽德安二府本已受旱成災復因襄陽縣隨州均有土匪滋擾光化穀城棗陽均州宜城南漳安陸隨州雲夢應山應城各州縣或切近賊氛辦理防勦或間被賊擾民情瘠苦茲更遷徙流離應一律將錢漕緩徵以紓民困又武昌府屬之江夏縣漢陽府屬之漢陽縣被水受旱兼因賊擾過甚應納錢漕另摺奏懇豁免並武昌府屬之武昌咸甯嘉魚蒲圻崇陽通城興國大冶通山黃州府屬之黃岡蘄水蕪州黃梅廣濟等州縣或迭被賊擾或尙爲賊踞應俟

楚境肅清彙於全省善後案內查辦卽陽宜昌施南
三府得雨較旱無礙收成興山縣雖有水患已在收
成之後且旋卽涸退毋庸查辦外所有前據黃安黃
陂孝感麻城羅田漢川沔陽鍾祥京山潛江天門江
陵公安石首監利松滋枝江荊門等州縣或因受旱
或因被水或因水旱頻仍陸續稟報均飭據印委各
員馳赴各州縣地方勘明被淹受旱情形分別輕重
議請蠲緩銀米開造區圖村莊名冊經該管道府核
轉由藩司馬秀儒署糧道張曜孫具詳請 奏前來
臣等覆加查核本年被水受旱田地僅黃陂孝感沔

陽黃安等四州縣勘明成災其餘各屬均屬勘不成
災至被水各屬內有監利縣積淹及江陵監利二縣
挖壓田地應完漕糧係於道光二年十年先後奏奉

諭旨準其緩徵現尙未能復業應仍照案計緩
所有勘明黃陂孝感沔陽黃安四州縣成災及勘不
成災各州縣被水受旱各田地或係低窪水漲卽淹
或處高阜難以灌溉除擬豁免蠲緩錢糧南米等項
另行具摺辦理外合無仰懇 天恩準將受旱成
災七分之黃陂縣麻老宋等二百二十九會孝感縣
尙義等一百二十會成災六分之沔陽州張家七里

等四百一垸並勘不成災之孝感縣觀善尙友等八
十二曾羅田縣平奉多三鄉栗子塆等六十區潛江
縣陽湖崔家等七十七垸天門縣關廟多多庸埠左
腦老獅器市花臺二郎西隄等垸內較重之區江陵
縣洪化橋龍隄等三百五十一垸公安縣毛一起一
等二十四里石首縣一都九嶺等三十六坊垸監利
縣永固六合等二百四十六垸並頻年積淹之崇林
等三十七垸松滋縣中二等入都甲荊門州七里等
二百七十四區各應徵本年漕糧均緩至來年秋後
成災者分限兩年帶徵未成災者統限一年帶徵至

咸豐三四五等年應行蠲緩漕糧因鄂垣迭陷文案被焚前已奏明俟楚省肅清後勒限辦理是以本年被災各屬僅就本年水旱輕重情形分別辦理所有議請緩徵漕糧緣由理合恭摺具奏伏乞皇

上聖鑒訓示再此案係因武漢軍務緊急司道相距均遠又兼襄陽隨州匪徒滋事竄擾無常各屬文報道路梗塞駁查往返實難依限彙齊辦理例限已逾災務重大謹飛章由驛五百里馳奏合併陳明

謹按此疏於十二月十八日接奉

查勘襄陽德安府屬災歉情形乞緩徵錢糧各

項疏 十二月初三日

竊照湖北各屬咸豐六年自夏徂秋曠乾日久受旱情形襄陽德安安陸三府爲首重安陸一府閒有濱臨湖河地方尙足稍資補慨已照各屬稟報彙入應蠲應緩應徵案內彙辦外所有襄陽德安二府各屬先已分別輕重將應行徵緩之處具稟到司係屬照例辦理惟襄陽隨州地方均有匪徒滋事穀城光化均州亦被波及鄰屬居民或逼近賊氛流離播徙或猝不及防已被搶擾又或互相團練自衛村莊富者

出資貧者出力蓋藏之家亦因此隨時散發小民當
旱魃爲虐之後秋收失望本已困苦顛連茲復兵燹
驚惶難安農業失所貧民悍者藉口被災勾結爲匪
懦者轉移遷避覓食四方體察情形糧賦勢難徵收
雖各屬稟報原有酌量可徵之處該地方官亦因軍
餉支絀不敢不覈實稟明惟德郡五屬若據各屬稟
辦分別蠲緩應徵銀米數已無多襄郡七屬若據襄
陽宜城南漳各縣稟報應緩之數已多於應徵之數
棗陽均州光化穀城則賊匪散竄勦捕喫緊防堵正
嚴鄉民大半播遷各州縣自稟報被旱之後雖續報

得雨而節候已遲補種不及各地方官多帶領兵勇
防剿未能確勘覆稟現當緩輯災黎之際必須以安
貧爲保富之策臣等悉心籌議以上二府現在情勢
亦難開徵且與其有收徵之名可徵者仍屬寥寥不
若一律展緩以示體恤據藩司馬秀儒署糧道張曜
孫具詳前來合無仰懇天恩俯準將德安府屬
之安陸隨州雲夢應城應山襄陽府屬之襄陽宜城
棗陽南漳光化穀城均州各州縣應徵本年錢漕除
上忙地丁已徵在庫者先飭各屬勒限開摺報明以
杜侵漁外其未徵銀兩一律緩至咸豐七年秋後帶

徵仍俟勦辦事竣將應行蠲免豁免之處照例勘定
成災分數另行題報其屯坐各屬軍田亦一律照
辦庶幾被脅窮黎咸知解散各鄉團練更奮辛勤仍
嚴密查訪如有不肖官吏私徵苦累立即嚴參治罪
總期實惠及民以仰副聖主痼瘼在抱垂念民
瘼之至意除應行賑撫事宜已經奏明勸諭殷實
富戶各就災區或酌借米穀雜糧或分次平糶現在
全行緩徵則有餘之家更可勸令貸濟貧民是於緩
徵之中兼寓賑恤仍督令地方官妥辦外所有襄陽
德安二郡錢糧擬請一律緩征緣由理合恭摺馳

奏

查勘德安府屬旱歉情形請乞緩徵本年漕糧

疏 十二月初三日

竊照楚北各屬咸豐六年自夏徂秋曠乾日久其受旱情形襄陽德安安陸三府爲首重襄陽一府向無漕糧其錢糧南米及安陸府屬之天門潛江均經另捐辦理德安府屬隨州地方現有匪徒滋事鄰縣居民或逼近賊氛流離播徙或猝不及防已被搶擄又或互相團練自衛村莊旱災之後加以兵燹體察情形糧賦勢難徵收現當勦撫並行必須以安貧爲保

富之策臣等悉心籌議與其有徵收之名可徵者酌屬無幾亦復難期踴躍不若全行緩徵用示體恤據藩司馬秀儒署糧道張曜孫會詳請 奏前來合無仰懇 天恩俯準將德安府屬之安陸雲夢應城應山隨州五州縣應徵本年漕糧一律緩至咸豐七年秋後帶徵以廣 皇仁而示體恤其已徵在倉者仍飭司道轉飭各州縣據實開摺報明以杜侵匿並一面嚴密查訪如有不肖官吏私徵苦累立即嚴參治罪

謹按此疏於十二月十八日接奉

古華

胡文忠公遺集卷十三終

胡文忠公遺集卷十三

奏疏

三